



Mistral Vigeli Berther, Tujetsch 1878-1964
CR 1965, pag.67

«Gl'ei stabiliu ch'il carstgaun hagi inagada da murir.» Quels plaids ein puspei severificai inagada dapli culla mort da mistral Vigeli Berther, ch'ha concludiu il terrester cull'alva dil di della mesjamna digl emprem fenadur 1964 e rendiu si'olma al scaffider.

Cun mistral Vigeli Berther svanescha ina marcanta ed originala figura ord in da nos vitgs romontschs. Il defunct ei naschius 1878, ils 20 da settember, egl amureivel vitget da Camischolas, sco secund affon dils geniturs Duri Battesta Berther e Culastia, nata Monn. Ses geniturs ein denton bingleiti setratgs el vischinont, idilic uclaun Zarcuns, nua ch'els possedevan era casa e funs. Ensemblamein cun sia suletta sora Barla Tresa, pli tard consorta da signur president Gion Andriu Berther p.m., ha il defunct gudiu cheu ina biala affonza en relaziuns purilas. La scola primara, da lezzas uras sut la bitgetta de scolast Sigisbert Monn, Mustér, frequenta il defunct sco tut ils auters affons sis onns a Camischolas. Suenter tarmettan ses geniturs il giuven Vigeli alla scola claustral a Mustér, nua ch'el absolva 1891/92 la preparanda e 1892/93 l'emprema reala. Igl onns 1893/94 anflein nus nies Vigeli el collegi s. Michel, Zug, nua ch'el seprepares per sia futura clamada purila per la quala el ha adina giu ina tut apartia affecziun. Suenter vegn il frestg giuven a casa e fa il pur cun ardur sil fatg puril da ses geniturs. Il defunct era gia en ses giuvens onns in capavel pur e bien luvrer. El haveva che tagliava bein e siu canvau era lads.

Gia igl onn 1900 miera sia cara mumma, aunc buca fetg veglia, laschond anavos ina gronda largia. Entgins onns suenter banduna era la sora Barla Tresa il bab ed il frar per entrar el stan matrimonial. Bab e fegl eran ussa persuls sil bein puril. Empau cun fumitgasa, empau senza va quei tochen igl onn 1908, nua ch'il giuven Vigeli sospusa culla giuvna Marta Flury, feglia da Carli Flury, Segnas, ch'ei stada ina fideivla e premurada consorta. La letg ei stada benedida da buca meins che tredisch affons: nov fegls e quater feglias.

L'educaziun ed il quitau per lur affons mava als geniturs oravon a tut auter. Schegie ch'ei era buca adina lev cun ina aschi gronda famiglia ein els buca senuspi da purtar enorms sacrificis per la formaziun e scolaziun da lur affons. Ils conjugals ein el decuors terrester tuttavia buca stai preservai da cruschs e travaglias. Buca meins che sis da lur cars affons han els stuiu accumpignar sin santeri. Gl'emprem ei morts sco affon pign. Il secund, la frestga mattatscha, Filomena, ei morta 1929, da 15 onns, raffada naven d'ina maligna malsogna. Il mars 1933 miera il tafer giuven Duri, il vegl dils affons ella vegliadetgna de 22 onns. Puspei, pign interval suenter, il fenadur dil medem onn sedisgraziescha il fegl Felici, seminarist negaus fagend bogn el lag da Hallwil, mo 17 ½ onns vegls.

Il tschunavel dils affons ch'ils geniturs ston puspei dar sco tribut al Segner ei in auter fegl: dr. iurist Carli maridaus Gendre. Fagend in'excursiun el alp Nadels, Trun, vegn el anetgamein surprius dalla mort, ils 31 da fenadur 1948, mo 35 onns vegls.

Quellas fridas d'in nausch destin supportan ils geniturs en resignaziun cristiana. Nuotatonmeins laian ellas lur lastridas e sgurdineschan tier la greva lavur oravontut la sanadad della mumma che miera gia cun 67 onns, igl onn 1952.

Il temps spira e medeghescha plaun plaunet las plagas. Finalmein marida il davos fegl Gebhard, ed il vegl bab ei fetg cunts da saver surdar siu fatg puril, acquistaus cun breigia e fadigia ad in dils ses. Cun tschaffen e curascha surpren Gebhard la bitgetta dil puresser ed il bab ei leds da saver far sera sontga. Dals 13 affons resta aunc la feglia Culastia che sedecida da star ed haver quitau dil bab, quei ch'ella fa cun tutta carezia. Mistral Vigeli Berther pareva ussa da guder ina biala sera della veta. La providentscha veva denton aunc semtgau ina nova emprova. Gebhard, il fegl che veva supriu il fatg puril, miera tut anetgamein ils 29 da mars 1963 e spazza las speronzas ch'il vegl mistral veva tschentau sin el. Ella vegliadetgna da mo 39 onns sto el bandunar la cara consorta e ses dus cars affonet.

Mistral Vigeli Berther ei buca mo staus in excellent mariu e bien bab per sia gronda famiglia; el ha sper il quitau per la famiglia e siu considerabel fatg puril aunc administraru exemplaricamein differents uffecis en vischnaunca e cumin, da maniera che ses superiurs savevan buca far auter che spender cumplein laud.

Beingleiti ein ils vischins en vischnaunca vegni allerts della formaziun da caracter e habilitads spirtalas dil giuven Vigeli. Gia cun 27 onns vegn el eligius cassier da vischnaunca, da lezzas uras «statalter». Da questa scharscha s'avonza el sco gerau da vischnaunca per plirs onns. 1923 confida la vischnaunca ad el il mandat da president communal, ch'el administrescha sis onns.

Era el cumin vegn president Berther enconuscentas e fa cariera. Secomprovaus dus onns sco deputau dil Cussegl Grond surdat la tschentada da cumin al defunct gl'uffeci della mistralia. Duront quater onns sa el applicar cheu siu clar patratg e siu saun spert giuridic.

Da 1933-1949 administrescha Mistral Berther il buca lev uffeci da president tutelar della Cadi.

Igl uffeci civil da sia vischnaunca diregia il defunct da 1909-47. Grazia all'excellenta scartira da Mistral Berther vegn el eligius oficial dil register funsil gia 1906. Quei difficil uffeci administrescha el entochen 1962, pia 56 onns.

1944 anflein nus el denter ils fundaturs della Cassa da Raiffeisen, la quala el presidiescha entochen 1960. En vesta a ses merets ha la Cassa da Raiffeisen eligiu el per president d'honur.

Era ei il defunct staus revisur da quen della cassa da malsauls Cadi e quei buca meins che 39-40 onns, nua che ses survetschs eran zun apprezzai. Resumein nus tut la lavur prestada dil respectau defunct stuein nus surstar. Bein era mistral Berther ina natira robusta el haveva retschiert dal Scaffider, sper ina sanadad da fier, aunc auters buns duns. El ha luvrau cun quels ed acquistau ulteriurs. Mo aschia eisi stau pusseivel da prestar tons survetschs al generalesser, malgrad sia mudesta scolaziun.

Avon ina retscha d'onns vev'il defunct dau giu tut ses uffecis. Per el era ei sera, gleiti notg. Ussa sededicava el mo pli all'emprema part da sia devisa: «Ura e lavura». Quasi mintga di serendeva el a Sedrun a messa ed al baun della sontga communiu. Mistral Berther ei aunc il di avon sia mort staus a messa e funcziuns da bara, cun caschun della sepultura da nossa preziada convischina Maria Constanzia Loretz e retschiert Niessegner duront messa. Aschia ha el detg per sesez sin santeri igl usitau paternies che vegn recitaus «per igl emprem che suonda». Cull'alva da l'auter di ha il Segner gia clamau el.

Mistral Berther era gl'um che veva mai fuolas - peda ha tgi che pren -. El anflava adina temps da scumiari in per plaids cul concarstgaun en siu enconuscent saun humor, ne magari era da cargar ina buna pipa e far ina pli liunga discurida. «In um senza humor ei buca in um», veva el per moda da dir. In bien amitg ed um renconuschiu en ed ord vischnaunca ei buca pli. Igl emprem venderdis dil meins, ils 3 da fenadur ha in impossant conduct da bara accumpaignau nies vegl mistral alla fossa. La suprastonza communal, in numerus diember da convischins, hospes d'ordeifer e numerus representants dellas vischnauncas e politica han dau ad el la davosa honur. Bials ed edificonts ei staus il requiem dil ludeivel chor-beselgia, commuentonts e consoleivels il cant funeral dil chor mischedau. Omisdus chorus han priu dign comiau da lur commember d'honur. Cunzun sesentin nus intimai da menziunar il bi riug da nies rev. sur plevon Giusep Durschei, che ha cun paucs plaids circumscrit la personalitat da mistral Vigeli Berther, in um d'oraziun e lavur.

En num dil cumin della Cadi plaida sgr. mistral regent, Hermann Lutz, Curaglia. En in bi plaid da bara seregorda el dils gronds merets dil defunct en general ed en special pils survetschs prestai el cumin. Per nus che vein enconuschiu e viviu cun il defunct eis el staus in exempl d'oraziun e lavur.

Vegli il Tutpussent remunerar Tei per tut Tias lavurs e stentas e nus clamein tier a Ti: «Rauassa en la pasch dil Segner, vegl bien amitg, ed a bien seveser en in meglier mund!»

Probabel tress il defunct la schuiala, legend el quest siu necrolog e schess: «Mu, quai vess tuttavia bétga fatg basegns, e gida, gid'ai per lura snuaivel pauc!»

Il defunct mistral pudess haver ina certa raschun R.I.P.

Gion Antoni Beer